

SARS A KGAKOLA HO THEHWA BOTJHA HA SETSI SA DIKGWEBO TSE KGOLO

JOHANNESBURG, 23 Mphalane 2019 - Khomeshenara ya SARS Edward Kieswetter o kgakotse ho thehwa botjha ha Setsi sa Dikgwebo tse Kgolo mapatlelong a sona a matjha mane Woodmead kajeno. Nakong eo a neng a bua le bahlanka ba ka sehloohong ba dikhampani tse kgolo, Mong. Kieswetter o boletse ka boleng bo tlang ho tliswa ke Setsi sena se thehilweng botjha mabapi le boikobelo ba tefo ya lekgetho ka boithaopi hara dikgwebo Afrika Borwa.

Ponelopele ya SARS ya 2024, e tsebisitsweng ke Mong. Kieswetter, ke ho aha SARS e bohlale ya sejwalejwale eo botshepehi ba yona bo sa belaelweng, e tlang ho tlotlwa ke bakgathatema bohle, mmoho le bomphato ba yona ba matjhabeng.

Ha jwale lekgetho la lekeno la kgwebo le na le seabo sa boraro se seholo sa pokello yohle ya lekgetho, le bile le kabelo ya 16.6% hodima pokello yohle ya lekgetho ka selemo sa ditjhelete sa 2018/2019.

Mong. Kieswetter o hlwaile maikemisetso a mawala a tlang ho kganna Setsi sa Dikgwebo tse Kgolo mabapi le boikobelo ba tefo ya lekgetho ka boithaopi, pokello ya lekgetho e sebetsang ka ho phethahala mmoho le ho ntlafatsa tshebeletso le dikamano tsa SARS le dikgwebo tse kgolo. Hodima moo, Setsi sa Dikgwebo tse Kgolo e tla ba setsi sa boqhetseke se arabelang diphephetso le ditlhoko tsa lekala lena la molefalekgetho ya tshopodi ho bapa le ditlwaelo tsa matjhaba tsa taolo ya lekgetho.

Boleng bo tliwang ke setsi sa dikgwebo tse kgolo ke ho phamaisa boikobelo ba tefo ya lekgetho ka boithaopi ka ditjeo tse tlase ho molefalekgetho le ho SARS, ka katamelo ya metjha e meraro e kentseng -

- Botsamaisi ba ka dinako tsohle ba dikamano tsa indasteri le lekala, ho netefatsa hore dihlopha tsa lekgetho tse abetsweng tlelaente di na le tsebo le kutlwisiso e ikgethang ya kgwebo ya tlelaente.
- Sehlopha se nang le boitsebelo bo boholo le se profeshenale se tsebang ho sebetsana le mefuta e mengata ya lekgetho molemong wa balefalekgetho ba nang le dipotfolio tse tshopodi tsa lekgetho, ho akareditswe le bao ba sebetsang mabatoweng a tlasa taolo ya melao e mengatangata ya lekgetho. Ho fihlela sena, SARS e ikemiseditse ho bebofatsa kutlwisiso ya molefalekgetho mabapi le boikarabelo ba hae le ho ntlafatsa dihlahlobo, dioditi le motjha wa tharollo ya kganyetsano.
- Botsamaisi bo bohareng ba ditlhoko tsa molefalekgetho tse mabapi le boikobelo ba tefo ya lekgetho ho phatlalla le mefuta yohle ya makgetho eo SARS e e bitsang tshebeletso ya 'One-stop shop'. Tshebeletso ena e neha molefalekgetho monyetla wa ho buisana ka tsela e momahaneng le SARS mabapi le tlhoko efe kapa efe e mabapi le lekgetho kapa potso eo molefalekgetho a ka bang le yona,

ka tsela ya ho ba le dikamano le sehlopha se le seng sa botsamaisi se tsamaisang potfolio yohle ya bona ya lekgetho.

Karolo ya molefalekgetho eo Setsi sena se tsepamisitseng maikutlo hodima sona ke dikgwebo tse kgolo tse hlahoswang e le dihlopha kapa ditheo tse nang le tjhelete e keneng e ka hodimo ho R1 billion; tse ho *Johannesburg Stock Exchange*; ditshebeletso tsa kgwebo tse nang le tjhelete e keneng e leng ka hodimo ho R500 million; dikhampani tsa merafo tse nang le tjhelete e keneng e leng ka hodimo ho R500 million, ditheo le dihlopha tsohle kapa dihlopha tsa dikhampani tseo boleng ba thepa ya tsona ka kopanelo di leng ka hodimo ho R100 million, ho akareditswe le dikhampani tsa matjhaba. Karolo e nngwe ke e bitswang *Ultra High Net-Worth Individuals* e leng batho bao paloyohle ya thepa ya bona e fetang R75 Million. Balefalekgetho ba welang tlasa e nngwe ya mekgahlelo ena ba ngodisitswe le Setsi sa Dikgwebo tse Kgolo sa SARS.

Setsi sa Dikgwebo tse Kgolo se fumaneha Woodmead North Office Park, 54 Maxwell Drive, Johannesburg.